

**OKU Tidak Dipinggir - Najib
Bernama
4 Oktober, 2012**

PUTRAJAYA, 4 Okt (Bernama) -- Kerajaan sentiasa perihatin dengan golongan Orang Kelainan Upaya (OKU) dengan memastikan Belanjawan 2013 dapat meringankan kos hidup golongan itu.

Perdana Menteri Datuk Seri Najib Tun Razak berkata ada beberapa langkah dalam belanjawan tersebut untuk golongan itu antaranya program Kebajikan Rakyat 1Malaysia (KARISMA) dengan peruntukan sebanyak RM1.2 bilion.

"Kerajaan juga akan memperuntukkan sebahagian Program Perumahan Rakyat (PPR) untuk golongan OKU selain akan membina Taska OKU," katanya dalam program #Tanya Najib: Belanjawan 2013 yang diadakan di Seri Perdana di sini Rabu malam.

Program selama sejam bermula pukul 9 malam itu turut disiarkan secara langsung di laman YouTube dan Astro Awani.

Dalam program itu Perdana Menteri turut menjawab pertanyaan sejauh mana kerajaan dapat mengawal harga barangan makanan dan minuman berikutan pengurangan subsidi gula.

Najib berkata kerajaan akan sentiasa memantau harga makanan dan minuman untuk memastikan pengurangan subsidi gula tidak dijadikan alasan oleh para peniaga untuk menaikkan harga sesuka hati.

"Apa yang boleh dikawal menerusi undang-undang, kita akan kawal dan yang tidak boleh, kerajaan menasihatkan peniaga tidak bertindak sedemikian," katanya.

Di samping itu, katanya kerajaan telah menyediakan Kedai Rakyat 1Malaysia dan akan memperbanyakkannya lagi untuk mengurangkan beban rakyat.

"Jadi tidak payah beli di kedai yang menaikkan harga, belilah di Kedai Rakyat 1Malaysia, gunakanlah kemudahan yang kerajaan sediakan," katanya.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=699476>